

漫塘文集

二

一

二

三

四

五

六

七

八

九

十

漫塘文集卷四

宋金壇劉宰著

七言古風

送王穎叔分教山陽

向來肉食昧遠謀坐談欲復千古讎良平不逐勝詭游  
毛錐竟作書生羞楚山蒼蒼楚水流甲光向日金鱗稠  
酒闌一笑看吳鉤將軍意氣傾九州先生身短智則脩  
百鍊可使繞指柔安邊端藉帷幄籌泮宮還獻馘與囚  
英聲南來動冕旒貂蟬未必生兜鍪

再韻謝和章之辱

老人抱甕真拙謀五利多方無一讎嗟予老矣盍倦游

犢鼻豈恤王孫羞舍西白鳥湛清流舍東古木鳴蟬稠  
晚風徐來月一鉤從渠飛鳶墮炎州君門有詔道阻脩  
飢來聊復擷芳柔諸君行矣攄良籌鍾儀不慮南冠囚  
野人何自瞻前旒所願邊風脫兜鍪

再用韻呈同席者

由來道同相爲謀利交始合終相讎灌竇空如父子游  
耳餘莫刷千古羞臞張不與俗同流常棣相輝華萼稠  
俟生得句魚上鉤句法不減韋蘇州王子簡古師穆脩  
時亦枯枝蔓新柔坐談不知改更籌絕勝雙鳥各處囚  
可能無策上凝旒夕烽猶照萬兜鍪

舟過橫塘有感

平波淺草橫塘路曾挽扁舟衝急雨朱顏綠鬢氣崔嵬  
欲斥九關揮玉女萬古功名付汗青九天光寵生門戶  
邯鄲一夢兩周星霜壓孤篷日怙晴風樹不停身已老  
病容衰鬢鬼猶驚東烏西兔自昏曉北來南征幾時了  
海上欲覓安期瓜山閒卻值孫登笑澤畔殷勤訊漁父  
掉頭不言吾已悟蚤求富貴晚長年老少不同君計誤  
連年旱魃失祈禳人肝不厭犬豕腸今年稻肥家有酒  
萬事且付無何有

代賦三十韻呈李果州

時遊茅山

退之抗表出潮陽高風萬世爲美談衡行雲氣偶然爾  
浪占顯晦吾所慙皇華使者課第一詔歸臺省部朝參

獻疏豈止一痛哭引去自言七不堪留行隱几臥不應  
一麾出守天西南利名百念已灰冷掃除不盡山水貪  
行遍金焦到茅阜知有佳處須窮探春花秋葉事已過  
惟有山髮呈鬢鬢山神頗亦媿岑寂夜奏萬谷笙鐘酣  
起看瓊樹繞琳宇更馳玉馬無停驂子猷好事古無比  
雪中來往固所諳青鞋直上最高頂天風縹緲吹榭楠  
兩峰相對如拱立上公袞冕朝子男羣山斂退就平地  
滅沒不見如紀譚巨浸東連大洋海浩蕩直與天涯涵  
卻顧淮源赤山下赤山湖  
舊淮源僅若覆水盈罌甌久留不奈  
景清絕山腰下轉臨深潭客來客去泉自湧可能喜笑  
靜中含嵌崖往往記遺蹟舊雨剝蝕苔蘚簪客懷感此

重太息學仙便欲老石龕癡狂正復白譏笑曠望聊爾  
依精藍元符舊事不可問翠微傑觀猶耿耿有田連阡  
不輸稅飽食豈計皇恩覃渠儂不知游子恨寶鑰屢啟  
彫龍函留連信宿若未厭一笑相屬樂且湛龐眉道士  
傭中佼成書自許窺老聃扣門有問不得吐退自包裹  
如春蠶鬣李於書頗涉獵醫卜並試仍多婪提攜瓶酒  
味苦短黃獨屢薦山肴甘坐談袞袞不知曉林杪忽送  
鍾聲籟人生離別易感愴況我垂白今甦甦明朝日出  
山下路宿雲散盡開晴嵐君歸千騎圍畫錦我留古木  
繚茅庵期君再整沖天翼老我甘作書中蟬

畏雨不出簡張端表昆仲符伯壽諸兄

我居市北子市南中間萬口喧春蠶子來自南我自北  
繚繞東西厭匍匐塊坐不言中有得谷鳥一聲驚晝息  
翻然卻念友多聞獨有君家好弟昆嘯軒團團朝至昏  
古往今來入討論興來握手眇乾坤一鼓平沙萬馬奔  
隔牆更喚符夫子青眼相看忘汝爾金丸屢墮銅壺冰  
欲竟書囊了無底欲辭勇往問荀陳脩竹亭前一欠伸  
朝來好語聞行人老龍駕雨上天津

速陳李二居士還茅山

陳居士不甘世味而以醫

受知於石大夫李居士不受世事而以碁見遇

於杜通直通直時就養尉解乙亥夏皆來金壇

漫塘叟恐孤林壑之望爲賦此詩以速其行



髯李魁然玉抱璞淡陳蕭散出林鶴華陽洞口笑相逢  
天風自奏鈞天樂飛雲出岫本無心大隱不必皆山林  
朱絃自振山水音王喬梅福古猶今君不見洛之南涯  
溫生北涯石明月灘頭弄澄碧河陽御史一張羅曉猿  
自掩松關寂久旱得雨方一犁山南種豆猶其時山僮  
倚擔遲君歸語君雨過黃獨肥亦有晚笋穿疏籬急歸  
燒笋煮黃獨北山移文可無續

喜西崗橋成并書邦美東西橋記後

西崗水與洮湖通脩梁自昔橫西東百年興廢人不同  
誰其記者竹庵翁喜君架木續前功朝曦夕照明垂虹  
地脈不斷和氣鍾紆朱曳紫還家風邂逅歸來一畝宮

幽花野草迷青紅躬耕會有年穀豐笑詠五柳卑揚雄  
可但日高花影重羅帷醉起酣笙鐘

和劉聖與顧龍山約客韻

詩筒四出走中涓詩句萬選如青錢曰余借舟期七賢  
共嗅梅花咀芳鮮津頭幾度喚長年晝眠乃若經笥邊  
舉頭急雪風中旋瞪視不見山之巔八牕玲瓏繡佛前  
同來且結西方緣小軒宛若壺中天玉琴不斷雨聲傳  
諾君再宿余敢愆從君索句發春妍

寄和趙章泉

章泉先生虎豹章餘子駭逐狐兔藏少陵遊不返衡湘  
孤吟風月老林塘鴛鴦不送我置傍悵望空勞水一方

廣文別日天未霜殷勤寄音示無忘新詩寫作鴻鴈行  
憐我病骨猶嵇康續貂聊復寄歸航宮墻百雉如金湯  
登門歲月知何當江湖極目煙波滄

寄呈王浩翁府判

天下江山推第一多景名樓信端的君家正占多景前  
第一風光環燕席梁邑歸來縣債了驂騮得路乾坤小  
錦衣聊復效晝游戶庭鬱蔥佳氣繞手栽松菊成三逕  
更敞軒楹臨綠沼客來寧厭馬喧櫪夜宴不知雞戒曉  
辟書聞又上公車連帥親題仲舉輿只今淮上未安集  
二虜南望猶睚眦要知兩淮須保障保障一撤長江孤  
邊臣之慮不及此但知椎剝供苞苴紅女去機農釋耒

荆榛滿野號猩鼯君官其閒踰十載洞識本末知盈虛  
願君亟分刺史符稍回和氣還邊隅盡收狙詐入赤籍  
有功必賞罪必誅招來耕桑徧隴畝撫摩一意淪肌膚  
人知親上死其長荷戈不憚供前驅闕如當道臥於菟  
犬羊遯走寧復餘更歸未用師黃石且侍玉皇香案側  
不惟文武見全才要與清朝分淑慝

送魏華甫侍郎謫靖州

靖州風物最五溪畬田歲入人不饑淘沙得金邀以嬉  
瘴煙不逐嶺雲西六花瑞臘春臺熙尤便逐客過往稀  
理亂黜陟了不知夫子豈欲居九夷要尊主勢扶時危  
有言不用時我違番然不受好爵縻向來鄉行誰可晞

平生易名慕者誰蘇陳凜凜百世師畏塗萬折甘如飴  
求仁得仁固其宜大明當天照隱微直前一疏可忘之  
江頭後會端有期暗香微動寒梅枝臨別不用長嗟咨

送王常博萬歸蜀

東溟之水浩無窮蜀江袞袞來朝宗聖神天子坐法宮  
日月所照梯航通君才當代相如雄雲煙落紙聲摩空  
西來闡教臨辟雍冠帶濟濟如雲從力排黨論開至公  
鳳鳴駭矚朝陽桐太常正俟肅臣工歸舟卻沂蜀江風  
蜀天萬里車書同不應一士無留中篙師振柁毋怱怱  
趣回有詔紫泥封

奉送符伯壽尉太平

一年三伏秋後前大火更借炎官權竹林杖屨北窗眠  
君方陸走水行船君言半世苦迍邐一官遲次安且便  
瓜時驟及非偶然今我不往人爭先交承久宦思田園  
側身東望心悁悁民情厭舊期改絃今我不往人煩冤  
左符再下催行軒欲挽君留胡得焉君才明敏性靜專  
天府四舉賢書連民淳不假綵棒懸定知學子來差肩  
酌君薦藕侑新蓮青白不受汗塗遷贈君以筆并吳牋  
官閒鐵硯勤磨研敬亭山下有臞仙耕雲釣雪老林泉  
癢痾預欲知民編少屈從之古道邊長官報政將朝天  
集英唱第吾同年賸欲因君寄短篇有言不盡中勤拳  
相逢一笑開初筵爲說故人今白顛

夏 題解生山水圖

長江之水西南來江北江南圖畫開君從何處得此景  
錦帆似泛長江回槎牙老樹連荒島兩兩人家出林杪  
鷗飛欲下洲渚寬雲橫不斷關山杳圖窮雙嶼金焦峙  
仙宮縹緲浮寒水桅樓振轉吳波平閭闔中天日月明

玉糝羊歌

華陽洞口玉糝羊世人傳得神人方雪團入口桂椒香  
能令老者壽而康瑤池玉佩正丁當箬筍聊薦九霞觴  
世言神仙不鮮食初平山中果何物桃源更有避秦人  
割雞爲黍迎來賓

石翁姥

采石江頭風晝息掀天雪浪平如席  
松崖小泊客心寬  
攀蘿曾看望夫石天涯望斷人不歸  
露寒猶想淚霑衣  
爭似石翁攜石姥年年對峙夾岡道  
人歸人去我何心  
雨沐風餐人自老比翼鳥連理枝年  
多物化徒爾爲長  
生殿裏知不知

送趙居父入淮東漕幕

儀真在昔發運司承平舊事猶可稽  
歲漕東南六百萬  
碩米自淮入汴趨京師周原六轡光  
陸離建臺想像因  
遺基水浮陸走舟車湊轉輸十九資  
殘寇古今事異吁  
可悲民力已困國不支長才入幕宜  
深思皇華使者須  
良規



雅去鵲來篇

昨日雅鳴繞庭樹道上行人色驚懼試呼行者問如何  
身爲戶長催殘稅稅口自昔稱難理三年尤非四年比  
加之逐保有逃戶每一申明官長怒人逃信矣田不逃  
其奈逃田不知處厥初經界失區畫比近立租相什伯  
大家置產錢欲輕小家鬻產價欲增上田只割下田賦  
賦存田盡因逃去或因土瘠遂流移歲久田侵人不知  
更有鄉胥迫科柳多推少割隨胷臆民愚而神難盡欺  
往往增入逃戶籍以茲逃戶日增多戶長蚩蚩奈若何  
向來差役多輕重戶長之中中產眾比來里正多義役  
各欲供須有全力搜羅中產無子遺戶長人人家四壁